

INFO-PRAG

Numerò 2

HUELHETON INFORMATIU DETH PARTIT RENOVADOR ARTIES-GARÒS

auents, 1999

EDITORIAU

Auetz enes vòstes mans eth dusau numerò deth INFO-PRAG demoram que age era madeisha acelhuda que eth prumer. Vos rebreban qu'ei un miei entà expressar públicaments çò que mos preocupe a toti. A toti vos desideram un BON NADAU e un HERÒS AN 2000.

Enes cases de Garòs receberen era setmana deth pònt dera Immaculada ua "Nota informativa"; -en castelhan- que semblaue destinada a un d'aqueri pòbles deth sud d'Espanha que patissen tanta sequera. Didie: << [...] Si no podemos regularizar el suministro continuo, nos veremos obligados a restringir en horario el suministro de agua. >>

Era gent se demane encara com pòt èstar que damb un depòsit nau que s'a hèt aguest ostiu non i age pro aigua. Non s'a acabat eth depòsit? S'a uetat per accident o per descuet? Encara non en sabem tirlat. Eth càs ei qu'enes cases dera part nauta deth pòble i auec quate dies qu'era aigua non arribave ena planta de naut o ère ben escassa. Saberam bèth dia qué passe damb era aigua en Garòs? Tornaram a auer nòtes amenaçadores que non expliquen es motius des problèms?, o serà com tostemp, tot un mistèri.

ETH PRAG EN CONSELH GENERAU D'ARAN

Eth mes de seteme comencèren ues òbres en Barranc deth Monte d'Arties. Un conjunt important de vesins deth pòble comencèren a demanar se qué ère aquerò que hègen, e se se respectarie eth camin entath bestiar.

Deuant d'aguestes inquietuts eth Conselhèr Miquèu Barra deth PRAG hèc ua pregunta en plen deth Conselh Generau d'Aran entorn ad aguest ahèr. Eth Magnific Sindic contestèc qu'eth Conselh Generau non auie competències en aguest ahèr, e qu'era informacion sus aguest projècte s'auie de sollicitar en Ajuntament de Naut Aran. Eth Conselhèr demanèc era informacion en Ajuntament de Naut Aran e se li comunicèc qu'ere eth Conselh Generau qui l'auie.

Ath veir que non s'en trège aigua clara sus aguest ahèr, Miquèu Barra sollicitèc per escrit ath Sindic d'Aran era possibilitat de poder examinar eth projècte entà recéber informacion mès detallada.

Quina non serie era sua sorpresa qu'ena contèsta de Sindicatura reconeish qu'en aguesti moments non i a cap d'exemplar deth projècte ena Val d'Aran, e qu'eth Conselh sonque l'a agut un petit espaci de temps entà negociar era crompa d'ua finca a un iniciament anaue eth dique. Com se hè eth seguiment d'aguest projècte se non i a plans ara disposicion des tecncs deth Conselh? S'an respectat es camins que i passauen? Realment aguest ei un bon sistèma entà arturar es lauegi? Poirà arturar es povins?

Com se pòt veir eth nòste representant ath Conselh non dèishe de trebalhar peth pòble, ei er únic conselhèr d'Arties-Garòs que non a faltat a cap de sessiò.

TEMPORADA NAUA, PROBLEMES VIELHS

Vaquèira-Beret a daurit es sues pòrtes e un an mès mos trapam tamb es madeishi problèms. Arties ei un pòble que concentre ua grana activitat diurna e nocturna, restaurants, otèls, tauèrnes de net... mès non a es infraestructures sufisentes entà atier com cau eth volum de visitants e coches que van entà d'aguesti negòcis. Un bon exemple lo veiguèrem eth passat pònt dera Constitucion.

Pendent era campanha electorau es Srs. Víctor León e Jesús Rodríguez prometeren cercar solucions ara manca de parcatge e as desordens que provòque bèth tipe de visitant. A on son aguestes solucions? Se eth passat iuèrn siguec un caos, qué pòt passar tamb aguest? Qué passarà se per desgràcia se produís bèth huec o cau portar tar espitau a bèth malaut? Per on entrarà eth camion des pompièrs o era ambulància?

Se vos servís de bèra ajuda des deth PRAG proposam ua sèrie de possibles solucions:

- Augmentar es places de parquing logant prats apròp deth pòble a particulars pactant un prètz e ues compensacions adequades.
- Adequar e reutilisar places qu'en aguesti moments son infrautilisades.
- Planificar adequadaments eth us des zònes de parcatge existents entà que non queden ipotecades com a magazèm de materiaus de construccion.
- Replanificar era circulacion intèrna deth pòble pendent aguestes dates, obligant a circular per uns determinats carrèrs e profitant totes es entrades e gessudes deth pòble. Plaçar senhaus de tràfic que servisquen entà millorar e facilitar era circulacion pes auti carrèrs d'Arties
- Augmentar era preséncia des Mossos d'Esquadra es dies que se preveiguen conflictius.

Demoram qu'aguesti conselhs poguen resòler en part es conflictes que se presenten cada temporada. Voleràn meté-les en practica?

ERA SEGREGACION D'ARTIES-GARÒS CADA VIATGE MÈS APRÒP

Se era ponéncia aprovada peth Parlament de Catalonha ère ua esperança importantissima entà arténher era segregacion, ara a d'aguesta bona notícia s'en a hijut un auta que met de manifest es granes possibilitats que an ara Arties e Garòs de converti-se en Ajuntament.

Er expedient de segregacion tramitat per Ajuntament de Naut Aran entrec per fin en Departament de Governacion eth dia 16 d'abriu de 1999. Des d'aguest moment era Direccion Generau d'Administracion Locau auie 6 mesi entà resòlver er expedient de segregacion. Eth dia 15 d'octobre se taric aguest periode de temps e era Direccion Generau decidic prorrogar 6 mesi mes era resolució deth expedient.

Aguesta moratòria se deu ara situacion plan complicada qu'a ara eth Departament de Governacion dera Generalitat, ja qu'aguest a de decidir sus un tèma que ben lèu va èster analisat molt detengudament peth Parlament de Catalonha.

ETH DESBREMBAMENT DES CAMINS VESIAUS

Laguens deth pòble d'Arties cor un malestar degut ara desproteccion e pèrta de camins vesinaus. Eth camin que passaue entre era bòrda deth Macho des de Pinsàn (aué casa des Srs Abril) amassa tamb era grada dera glèisa e que gesseve darrèr deth cementèri ja non i é. Arrès s'esplicue com un camin vesiau que s'utilisauè entà que passèsse eth bestiar e es carros non i sigue e passè a formar part deth patrimoni d'ua familha, entà converti-se en un uart/jardin particular.

Aguest ei un exemple mès deth desinterès entara conservacion des camins agropecuaris e patrimonius dera pedania. Entà podé-les protegir s'an d'actualisar periodicament es plans catastraus deth municipi. I son aguestes actualisacions? Quan se comence un projècte se contrasten e respècten aguesti plans?

Edite INFO-PRAG
PARTIT RENOVADOR ARTIES-GARÒS
c/ dera Mòla, 6
25.599-ARTIES

Director INFO-PRAG: PRAG
Informacion: PRAG
Dessenh: PRAG